

10 MAY 2001

Syed Hamid-St Lucia

ST LUCIA MINAT JALIN KERJASAMA PELANCONGAN DAN TELEKOMUNIKASI

PUTRAJAYA, 10 Mei (Bernama) -- St Lucia, sebuah pulau di Caribbean, berminat menjalinkan kerjasama dengan Malaysia dalam bidang pelancongan dan telekomunikasi, kata Menteri Luar Datuk Seri Syed Hamid Albar hari ini.

Beliau berkata hasrat St Lucia itu disampaikan oleh Perdana Menteri Dr Kenny David Anthony pada perbincangan lebih sejam dengan Perdana Menteri Datuk Seri Dr Mahathir Mohamad semasa lawatan delegasi St Lucia ke Kompleks Jabatan Perdana Menteri di sini.

Syed Hamid berkata selain mengharapkan penglibatan Malaysia dalam bidang pelancongan dan telekomunikasi, delegasi St Lucia turut berharap dapat mempelajari cara mempelbagaikan sumber pendapatan negara itu.

"Kita akan melihat sekiranya ada minat pelabur-pelabur Malaysia untuk ke sana (St Lucia) dan menjalinkan kerjasama dalam dua bidang itu (pelancongan dan telekomunikasi)," katanya kepada pemberita di sini.

Sebelum itu, Syed Hamid menyambut ketibaan delegasi St Lucia yang diketuai Dr Anthony dan isterinya, Rose Marie, dan tujuh anggota lain termasuk Menteri Perancangan, Pembangunan, Alam Sekitar dan Perumahan Dr Walter Francois.

Delegasi St Lucia tiba di Malaysia untuk lawatan lima hari bermula semalam.

Syed Hamid berkata lawatan pertama kali Perdana Menteri St Lucia itu ke Malaysia adalah atas jemputan Dr Mahathir, yang pernah mengadakan lawatan ke negara itu tahun lepas.

Beliau berkata Dr Anthony kagum dengan pencapaian pembangunan Malaysia sebagai sebuah negara yang stabil, kukuh dari segi ekonomi dan dapat mengekalkan keharmonian dan persepakatan walaupun mempunyai rakyat yang berbilang-bilang kaum.

"Perjumpaan hari ini banyak pertukaran pendapat dan Perdana Menteri St Lucia ingin mempelajari pengalaman Malaysia dalam pembangunan negara," katanya.

Syed Hamid berkata sumber pendapatan St Lucia, yang mempunyai kependudukan kira-kira 150,000 orang, bergantung kepada penanaman dan pengeluaran pisang.

Menurutnya Dr Anthony berharap Malaysia dapat berkongsi pengalaman bagaimana mempelbagaikan sumber pendapatan.

"Dr Mahathir nasihatkan beliau (Dr Anthony) supaya pelbagaikan sumber itu dengan melihat apakah produk-produk lain yang boleh dikeluarkan dari negara itu supaya sekiranya apa-apa terjadi kepada satu produk, ekonomi negara tidak terjejas," katanya.

Dalam lawatan delegasi St Lucia itu, satu memorandum persefahaman bagi kerjasama dalam bidang ekonomi, saintifik dan teknikal dimeterai antara kedua-dua negara.

Syed Hamid berkata Malaysia tidak mempunyai kedutaan di St Lucia dan kedutaan Malaysia di Venezuela merupakan yang terdekat dengan St Lucia.

"Dengan menandatangani perjanjian sedemikian, ia akan membolehkan kita menjalin kerjasama dalam bidang seperti ekonomi, saintifik dan teknikal supaya sekurang-kurangnya ada rangka panduan untuk membolehkan kerjasama erat selanjutnya," katanya.

Secara keseluruhan, Syed Hamid berkata lawatan delegasi St Lucia itu berjaya dan Malaysia sebagai negara yang membangun mempunyai banyak pengalaman dan kepakaran yang boleh dipelajari oleh negara-negara lain.

"Kita berharap kita akan dapat terus berikan sokongan dan bantuan

teknikal dalam apa jua bidang (kepada St Lucia)," katanya.

Delegasi St Lucia itu turut melawat Unit Perancangan Ekonomi di Jabatan Perdana Menteri.

Esok, Dr Anthony dan delegasinya akan ke Langkawi untuk meninjau pembangunan pulau itu sebagai destinasi pelancongan.

-- BERNAMA

ZAI AZZ NAK